



STINAPA TA INFORMA

UN 'NATURALESA ON THE ROCKS', POR FAVOR.

Na henter Boneiru i asta na Miami el a bira popular komo ganador apsoluto di e kompetensha 'A Taste of the Caribbean' na 2006. Tambe el a sa di konkistá e promé puesto den e promé kompetensha di bartènder. E ta pelukera i profeshonal den manikür. Ademas, e ta hopi spórtif praktikando yudo, fòli i sòftbòl. Sí, Jane Coffie ta masha okupá ku su trabou komo bartènder, hòbinan i su dos yunan. Naturalesa ta e solushon pa e relahá. "Boneiru ta asina ketu i dushi. I naturalmente bunita". Jane gusta e forma di palunan, e kuebanan, buriku i kabritunan den mondi. Speshalmente ora e bestianan den mondi tin yu chikitu. Asina chuchu! E ta gusta mashá sinta opservá e serunan. Si bo paga bon tinu bo ta wak dibuhonan straño i asta rekonosé karanan den nan. Banda di mondi i otro tipo di naturalesa riba tera Jane gusta wak kon e laman ta kuminsá di blou klá i bai kue blou skur. I naturalmente e piskánan kolorido. "Mi tin ku splika ainda dikon naturalesa ta asina importante pa nos ekonomia? Esei ta lógiko!" Jane ta eksperensi'é tur dia den su trabou. E ta sigui splika ku e turistanan ta bini pa nos naturalesa i esaki ta e entrada mas grandi pa Boneiru. Ku e entrada aki, entre otro gobièrnu, por hasi hopi kos. Jane no ta basilá ni un momentu ora puntr'é kua ta su lugá faborito den naturalesa. "Mi ta di Rincon. Pues mi ta rondoná ku naturalesa. Pa mi Washington Park ta masha nèchi mes i ta mi lugá faborito. Mi playa mas stimá ta Playa Funchi, bo por baha i haña un boka ku yen di santu." Tambe tin yen di kokolishi masha bunita mes. Otro playa ku Jane gusta ta Slagbaai. Pafó di Washington Park e ta haña Altamira algu 'hopi apart'. Bo tin ei e mihó bista di Rincon i bo por apresia mas tantu e bunitesa di e naturalesa di Boneiru. Pa futuro Jane lo tin gana pa gobièrnu drecha Altamira, por ehèmpel dor di buta mas banki, hasi limpi èts. Ya asina nos por sigui mustra e turista kon bunita Boneiru ta. Tambe pa nos tur, inkluso gobernantenan, realisá e importansha di naturalesa i e efekto ku e tin riba nos bida diario. Tantu de nos ekonomia komo pa nos biba den harmonia. *Skirbí pa Natalie Wanga.*

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURALESA



Traha huntu na un desaroyo duradero pa Boneiru